

# OLA

PULETINI A'OGA

13 AUKUSO 2018 ~ Lomiga 23 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication



## otootoga

### Lau le iuga o le pepa iila

Ua faafofoga Niu Sila i le faaiuga o le pepa iila, e pei ona faaalua i le vaiaso na se'i tuana'i. Toe o se ono masina ua tuu i ai, ona le toe faatagaina lea lona faatauina i faleoloa a le atunuu. Ua iloa lona afaina i le soifua o tagata ma meafaiola o loo faalagolago i se si'osi'omaga mamā ma maloloina. Ua faailoa foi se vavao a Samoa i le pepa iila e lei mamao atu.

### Maumau tupe i se polokalame

E malosi se leo faasea mai ni a'oga i se polokalame ua faaigoa o le Mates & Dates. O le aano o le faasea e aga'i tonu i aga o mea e a'oa'oina ai. Fai mai le itu tete'e sa tatau ona a'oa'o fanau i aga faaaloalo e fesoota'i ai tama ma teine, le feavata'i ma tulaga faapena. E \$18 miliona ua togia e faatino ai le polokalame i kolisi uma. O se tupe faaalu maumau lenei, saunoa le itu tete'e.

### Masini pu'eata i le potu le ta'ua

Ua faailoa se leo o le tete'e e nisi o fanau a'oga a se kolisi i Northland. E mafua i ni masini pu'eata ua faapipii i totonu o potu le ta'ua. E tofu le potu o tama ma teine ma se meapu'eata. Peita'i o le 'auga o le faasea o le sagai tonu o mata o masini ma po i totonu o tama'i potu, atoa fo'i na e fa'aaoga e tama i fe'au lata. Na fesiligia le pule, o lana tali, ua sese le faapipiiga o masini.

### Sauni faia'oga i le Aso Lulu

Ua sauni faia'oga a le NZEI i la latou tete'e i le Aso Lulu. Ua uma foi ona logo matua i le fuafuaga e tapena i ai. E ono maua se fofu i se taimi lata mai.



**NAFANAFATA'I:** O le tiute lea faatalimalo Samoa, e vaai ma tausii a latou malo. E pei ona molimau le aumalaga a le UC sa talimalo ai fanau a'oga ma le afioaga o Vaiafai. O se sootaga lenei a le UC ma Vaiafai ua silia le 10 tausaga. I nei mafutaga e aofia uma vaega o le nuu: o sui o matai ma taulele'a le aualuma ma tina, faapea le fanau. I le ata le tofa ia Lealii'e, ma nisi o le autalimalo i le feiloa'iga.

## Mafuaaga na tapuni ai e Massey le faitoto'a ia Brash

O le fesili pe ua mafua i se a ona te'ena e se iunivesite se tasi e faaleo sona taofi i totonu o lona lotoa, e fia maua se tali.

A o le tali a le tapa'au (VC) o le a'oga, Jan Thomas, e leai. Sa ta'ua le popolega i le taiulu o le tula'i mai o ni fe'ese'esea'iga i le va o tamaiti pe a tuu le avanoa ia Dr Brash.

Mulimuli ane na tatala le faitoto'a a Aukilani ia te ia ma faapea ona faaleo ai sona taofi i le taua o le tautala sa'oloto.

Ua le māua pe sa fai se tuugatala a le a'oga ma Brash, pe o se mea e le'i fuafuaina; pe o se tali atu i le Leai a Massey, ae na taunuu lava. Sa lagona foi se leo o i latou e tete'e i ai.

E le o toe po se lilo i le tulaga o le taimi ua lagaina ai, ma le asiasi mai o se to'alua mai Kanata ma se fe'au e le talia e le to'atele.

O le faaiuga a le pulenuu o Aukilani, Lilomaiava Phil Goff, e te'ena lo la fa'aaogaina o fale a le taulaga, e faavae i luga o le tu ma le masani faa Niu Sila, e le talia ni saunoaga e faaleo ai le inoino ma le vaai maualalo o le tasi lanu i le isi.

Peita'i o loo ua lagalaga ai finagalo faaali i le tatau ma le le tatau. O nisi nusipepa



Willie Jackson ma Dr Don Brash e masani ona finau

a le atunuu latou te i'eina le faaiuga a le pulenuu, o isi foi e lagolago.

O Dr Don Brash ua lausilafia i le taimi na tula'i mai ai o le ta'ita'i o le National, aemaise ona taofi e tuua'iina ai le faaese ona fai o Maori mai isi. Finau mai Brash na'o ta'ita'i o le fale Maori o loo manuia i faiga faaese o loo mulita'ia. E te'ena lea taofi e i latou e pei o Willie Jackson o le Leipa.

O le sa'olotoga e saunoa ai o le faavae mau lea o se temokarasi, peita'i e tofu le malo ma lana faauigaga. I Niu Sila nei e foliga e iai le tua'oi o upu; e noatia ai le ua saunoa i le sopo atu i le gagana e faatupu ai le fe'ino'inoa'i i le va o tagata.

O le popolega lea i le tapa'au a Massey na faavae ai lana faaiuga.

### "mafauaaga o le vaiaso"

E iai le sa'olotoga e tautala ai ae taua atu upu e saunoa ai

Pole & Papa



*Ripoti o le Vaiaso:*

## Avea alii fusu Joseph Parker ma faia'oga i Whanganui

Ua sauni le alii fusu lauiloa, Joseph Parker e avea ma faia'oga mo se tasi kolisi a Niu Sila i le aso 21 o le masina leni o Aukuso.

Ua faalaua'itele nei le autasiga i le va o le pule a Whanganui High School ma le alii fusu e faataunuu ai le faamoemoe.

I leni avanoa o le a talanoa ai Parker i le fanau i se fe'au faala'ei'au ma faamalosi loto i a latou tauiviga taua'oga, atoa foi le olaga ma miti e fia ausia.

Peita'i ane e foliga ua muamua lulu sina tama'i mafui'e a o lei amataina le galuega a le faia'oga.

Muamua le mafui'e o le faimea faapito ma le faailoga lanu.

E tula'i mai na toe e le taunuu le fuafuaga, ina ua manatu Parker e taofi. E mafua lea ina ua fai le faaiuga a le a'oga ua lava na'o fanau Pasefika ma Maori e auai.

Na vave ona apo e le aufaasalalau le tala ma lipotia, ina ua faailoa se lagona o Parker o le le fia auai.

O le agaga i tua o le le fia auai e ono ta'uvalea ai le alii fusu, ma o le popolega lea i le pulega a Parker.

E leai se failipoti na ia ta'utino le pogai tonu, a o Mike Hosking na ia

tilotilo ma iloa atu le amio faailogalanu o loo pipii mai ai.

Na mafua ai ona ia faifaia le le pisa o le aufaasalalau.

E manino mai i lipoti o le mataupu, sa naunau le alii fusu e talanoa i le a'oga atoa, 1500 le aofa'i o tama ma teine a'oga.

Ae na fai le fuafuaga a le pule ma le komiti faafoe, ua lava na'o fanau Pasefika ma Maori, ma o latou tamā e auai.

O lea faaese na faavae ai le filifiliga a Parker e taofi.

Ina ua alia'e le mataupu i luga, na vave le tali mai a le a'oga. O la latou tali, o le le femalamalama'i. Ae atagia, ua le iloa poo le pule poo sui o le komiti faafoe e ana le faatatau lea.

E oo lava foi i nisi o matua na siligia, e iai le tamā papalagi ia Tony Greig. O lona atalii sa naunau e fia feiloa'i i le alii fusu, a o lea ua folafola e le pule



Lupesoliai ma lona tina, ausia se vaega tele o ana miti, e fua i le na'o le 26 le matua

e le auai se isi o i latou.

Sa fia faailoa se lagona o lona atalii i le pule ae popole ne'i afaina ai.

"Manatu la i se faaiuga faapea e faapito ai na'o fanau a papalagi ae le talia isi, e laulogo le fe'ei o se mea e le sa'o," saunoa le tamā ia Greig.

E oo foi i le pulega a Parker, le Duco Promotions, na faailoa la latou lagolago i le alii fusu, ma ta'utino e le o Parker lea. Na te le faaesea nisi.

Ui i lea, ua sauni mai Whanganui i le taunuu atu o le alii fusu i le aso 21.

Ua iloa le alii fusu o se tasi e augofie i soo se vala'aulia taua'oga. O ia foi o se tamā i se fanau laiti e to'atolu.

## Finau se faia'oga ma le Fono A'oga (EC) i le Igilisi

O loo fai se finauga i le va o se faia'oga ma le Fono A'oga (Education Council), e mafua i le te'ena o le talosaga a le faia'oga e fia lesitala o se faigaluega faau'uina.

O Jacqueline Hsu, e 12 tausaga potomasani i le faiva, 20 tausaga o alala i Niu Sila, ae ina ua talosaga i le Fono mo le lesitala, na te'ena mai.

O le mafuaaga, e le lelei lana Igilisi. Na manino foi i le tusi a le Fono na tali atu ai lona tulaga o se tagata fai mai (migrant).

Ua oso ai le le fiafia ma le fia valusi e le faia'oga o le Fono ma lana faaiuga.

E faigata ona talia e le faia'oga sea faaiuga pe a fua i le 12 tausaga o galue, na te umia le tikeri faia'oga. O lea tikeri na su'eina lava i Niu Sila nei. Sa mana'omia ai ona su'e le su'ega QPT, na pasi ai e 57/60 ona togi.

Ae ina ua avatu lana talosaga na tali mai le Fono e mana'omia ona alu e su'e le IELTS, talu ai e le o sana gagana muamua le Igilisi.

Ina ua talanoa ma se tasi o le ofisa na faapea mai e na'o tagata mai Sisifo, e iai Niu Sila ma Ausetalia e le su'eina.

O isi uma e fai mai i totonu e tataua ona su'e i se tasi o su'ega e fa o loo ua talia e le Fono.

E taofi le faia'oga ua faapito le faaiuga a le Fono e fua i faamatalaga ma le vaai lata mai.

Muamua e foliga ua faamasino ia i lona igoa, e le se igoa papalagi. Lua, ua faamasino lona tulaga fai mai, e manatu ai o tagata uma i le vaega lea e le iloa faaleo manino le gagana Peretania. Pe manatu o ia se tagata sulufa'i faato'a a'o mai le Igilisi iinei.



Ta'ita'ifono o le Fono A'oga: Barbara Alaalatoa; Jacqueline Hsu le faia'oga

E sese uma ni nei manatu. O lea ua na te'ena ai le faatonuga e alu e su'e le IELTS. E talitonu Jacqueline e faapito le faaiuga.

O loo feagai Niu Sila ma le oge faia'oga i leni lava taimi. Ua valoia le tula'i mai o se tāmā'i ogaoga i le 2030 pe a le vave ona fai se fuafuaga. O loo sauni le solotetee a faia'oga i leni vaiaso, atoa ma tala o nisi ua mafaufau e o ese ma le faiva.

A o leni faia'oga e fia galue a ua taofia mai ona o tulafono a le Fono.



*Faasoa o le Vaiaso: Levi Tavita*

## E mafai e fanau lalovaoa ona tineia le faailoga lanu

O le ta'ita'i ta'uta'ua i le va fealoa'i, Nelson Mandela e ana le lafoga, e leai se tagata e soifua mai ma se lagona o le faailoga lanu. O lana mau, o le faailoga o se tasi e ala i lona lanu, poo lana aganuu, poo lona tulaga, o se mea e a'oa'o e se aganuu i se tagata.

E ala lea i matua i fanau, poo totonu o a'oga e ala i anava a le malo, totonu o nuu e ala i taofi faaese, atoa foi le lotu e ala i talitonuga.

E tutupu a'e fanau ma ni mafaufau mamā ma le le ponā; ona utufia lea i taofi ma lagona o le aumatutua, poo na o se aganuu, ma faavae ai ni o latou foi taofi atoa ma gaioga. O le uiga lea o le upu a Mandela, a utu fanau i taofi faailoga lanu, ona pisia lea ma avea foi o ni e faailogalanu. A vaai tupulaga talavou i aga a le aumatutua, e le pine e apoina foi.

Fai mai nisi ua telē se la'a i luma. Ua tauau e galo atu faiga faaese a Amerika ma Aferika i Saute i na fatia ua alu; e faailoga ai nofoaga ma tulaga i lanu e lua—uliuli ma le pa'epa'e. Ae le faapena se lagona o le tele o tagata Aferika Amerika pe a siligia. E le tauilo, i Amerika e aliali tele ai; a o isi malo e 'ailililo, e tau

le iloa atu i le vaai. O le a le oo i ai se manatu, pau lea, ua iloa Niu Sila o se malo na te le onosa'ia lea amio.

E molimau lona tala, i mea na tutupu e pei o solo tetee sa faia e lu'iina ai faiga faailogalanu a le malo o tagata papa'e i Aferika i Saute. O le malo na mua i malae i le amana'ia o leo o fafine. O le atunuu na manatu e ave ese le tulafono e ta'usalaina ai fafine talitane; ae tuu pea i le Atua na te faia le faamasinoga, auā e le o se tiute lena o se malo.

O lea foi le faavae o le tali atu a le pulenuu o Aukilani i a i laua na to'ai mai ma la laua savali, e manatu le pulenuu e tupu ai le fevaevae'i o tagata. Na mafua ai ona te'ena le fa'aaogaga o meatotino a le itumalo.

O le malo lena, ma sina vaega; a ua iloa lava le tulaga moni; pau lea, e ilitata tagata uma pe a tuua'iina i le faailogalanu.

I le itu i a'oga, e le'i faasaoina e le alii faasalalau o Mike Hosking le pulega a Whanganui ina ua aliali a'e le amio faaese i totonu o lona lotoa.

Ua māua i le lipoti le aano o le tala. E atagia mai ua faaese fanau Pasefika ma Maori mai fanau papalagi. O le

faanoanoaga ona e le o se mana'o lea o le alii fusu, o le iuga na fai e le pulega.

E aliali le vaavaa o le pulega pe a fua i lagona fa'aali o le fanau. Fai mai le aufailipoti e to'atele fanau papa'e sa naunau e fia auai ma feiloa'i atu i le alii fusu. Peita'i ua uma ona fai le faaiuga mo latou e le pulega.

Pau le fe'au e ta'u atu e lenei pule ma le komiti i ana fanau a'oga papalagi, 'aia tou te o fua i mea a le vaega lela. Ua iai le faasala ma le faaese; ua toso le fua o le tua'oi e le pulega.

O le isi itu e faanoanoa ai, o le tuu ai ma tamā e auai. Ua ta'u mai ai e aogā tele le tautalaga a Parker ia i latou foi. Aisea na o tamā Pasefika, Maori, ae a tamā papalagi? E pei o le ao lona uiga.

O le faaese lava lea e atagia i le mataupu a le faia'oga ua 20 tausaga o nofo i Niu Sila, 12 tausaga o faia'oga, ae faatonu e alu e toe su'e se su'ega.

E le pine e maua se fofo o lenei ma'i i tupulaga laiti; afua atu i ta'ita'i e pei o Adern, Parker, pe a mavae atu tupulaga matutua mā latou avega faaitu'au, faaese, faailogalanu.

E iai le faamoemoe i le autalavou, e mafai ona latou faaumatia le manu fe'ai, ua fai ma fili o le nonofo faatasi.

## “Ou te fia iloa lelei oe, ina ia ou iloa ona a'oa'o oe”

Ou te fia iloa lelei oe ina ia ou iloa ona a'oa'o oe, o le anava a le mata-galuega o A'oga a le UC (Iunivesite a Kenetaperi), faatatau i fanau Pasefika.

Na mafua ai ona laga'i le taulagalaga a lana A'oga Faafaia'oga, e asia Samoa o se vaega o le tusipasi faia'oga. O le faamoemoe, e o atu faia'oga faalioli e vaai ma tofo ma lagona le olaga faaSamoa moni. O se mea lea latou te le o maua i si'osi'omaga fou o fanau. Ua laasia nei le 10 tausaga o lenei atina'e ma o loo sologa manuia pea.

I se talanoaga ma le taiulu o le Samoa Malaga, Lealiiee Tufulasi Taleni, na ia ta'ua ai le aoga o lenei polokalame mo itu e lua. Muamua sa ia matauina le leai o se tapenaga o faia'oga talavou papalagi e sagai ai ma le tiute o le a'oa'oina o fanau a Samoa ma isi mai nuu Pasefika.

To'atele faia'oga ua molimau i le suiga talu ona auai i le polokalame.

Na avea lona aiga ma le nuu i Vaiafai o le taulaga o taunuuga. E le o suia le taunuuga talu ai le mafana o le



sootaga ua tula'i mai. O isi sa malaga muamua ua toe malaga foi, e atagia ai le talimalo lelei o le afioaga.

O Iulai i tausaga ta'itasi e tuuvaa ai, e valu aso o le polokalame.

O mea e togi i ai le su'esu'ega, o le auai i asiasiga i a'oga, sauniga lotu, ma galuega faatino faaleaganuu.


I le galue ai i se aai e to'atele i

papalagi, e moomia le faatumuga o sea ava auā fanau, saunoa Taleni.

E ese le talanoa na o upu ese le a'oa'o atu ma tilotilo i aga o loo faatatau i ai se faamatalaga. O lenei faiga ua iloa lona aoga mo faia'oga e leai sina silafia o a tatou tu ma aga, o lana upu lea.

Na taumanuia aga o le 2018, a ua olioli mai le 2019. *Levi Tavita*





## 12 - 18 AUKUSO

12

1845 Afea Falealupo savali a Silipele & Lutovio Katoliko

14

1900 Faavae fono taimua ma Faipule

1905 Soloia fono a Taimua ma Faipule e Solofa

1939 Filifilia sui faaitumalo e 41 le aofa'i

15

1830 Iloa mauga o Salafai aumalaga Savali o le Filemu

16

1960 Fono Faavae i lona usuga lona lua i Ti'afau

17

1873 Taunuu i Apia Sitanipeka (Albert Steinberger) o le avefeau a le peresitene Amerika, Ulysses Grant

18

1830 Feiloa'i atu aumalaga a loane Viliamu i faifaiva Samoa o loo fai se alofaga i le vasa, e ala ia Fauea

1924 Aso Gafua. O le ulua'i taaloga lakapi faavaomalo a Samoa. Taaalo ma Fiti, malo Fiti 6-0. Faia i le taeao i le 7. Kapeteni a Samoa Harry Moors.

2004 Tafuna. Tuua Amerika Samoa e lana fitafita e 212 mo tiute o le taua i Iraq

\*\*\*\*\*

Nisi o Samoa lauiloa Aso soifua masina o Aukuso:

Pua Magasiva—10/8/1980  
i le faiva o ata tifaga

Henry E Tuilagi—12/8/1976  
i le lakapi, se sui o le Manu Samoa

Monica Galetti—26/8/1975  
i le faiva o le kuka lauiloa ai i Lonetona, Peretania



# F

ai mai o alii felela Malisi na latou aumaia le lakapi i Samoa, faapei fo'i o le kilikiti na aumai e misionare Porotesano mai Egelani i tua atu. E le i umi ae avea ma se tasi taaloga faatauaina. O le 1924 na faavae ai le iuni lakapi a Samoa. O le tausaga lava lea na taa'alo ai lana ulua'i 'au filifilia ma le 'au a Fiti. Fai mai o le ta o le 7 i le taeao po o le Aso Gafua na avau ai le ulua'i fetauiga. Na mafua ona vave fai ina ia maua e le 'au a Fiti le taimi o le vaa (MV Tofua) e malaga ai i Toga i le afiafi.

Na laei Fiti i le togiga uliuli atoa a o Samoa o le pa'epa'e. Pau le vaega na misi o seevae. Fai mai sa tu matilatila se niu i le moa o le malae ta'alo. A o lumana'i le taaloga na faia se lipoti a se nusipepa e faapea o Fiti e lapopo'a ma saosaoa a o Samoa e televavave ma popoto. A ina ua fepa'ia'i 'au e lua na vave ona iloa le popoto o Fiti i le faatinoga o le taaloga. Sa matele Samoa i le puipui i le taaloga atoa. Tainane lena malosi, na o le 6 na malo ai Fiti i le leai.

I le taaloga lona lua na malo ai Samoa e 9 i le 3 a Fiti. Na tuua'i e Fiti le faia'ina i le faagagafu e mafua i le auvasa mamao mai. O suafa nei o le 'au: T Allan, Alapati, Toni, Manu, Funu, Semisi, Ata, Atiga, Harry Moors, Moli, I Ripley, Pio, Edward, A Meredith, ma Alec MacDonald. O le kapeteni o Harry Moors. Faapea mai le nusipepa, o se taaloga na mata'ina i le finau malosi a 'au e lua e aunoa ma se ta'alo leaga na molimauina. Na faato'a toe fetauitu e lua i le 1954.

## Aukuso i le Tala Faasolo o Niu Sila



12 Aukuso 1816. Tatala ulua'i a'oga Misionare Peretania

13 Aukuso 2005. Maliu David Lange i le gasegase kanesa

15 Aukuso 1881. Helen Connon uluai sui o le emepaea faauu i le tikeri MA

15 Aukuso 1945. Ua ola le taua lona lua lalolagi ina ua siilima Iapani

## NIUPAC PUBLICATION

Email: [evaleon.books@gmail.com](mailto:evaleon.books@gmail.com)

Phone: (03) 382-6674

Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

### Editor:

Levi Tavita, MPS, BTheol, BA, Grad Dip Tchg  
[ltavita8@gmail.com](mailto:ltavita8@gmail.com)

### Reporters:

Saili Aukuso, MA, BEd, DipTESL, DipTchg  
[saili.niupac@gmail.com](mailto:saili.niupac@gmail.com)

Vavao Fetui, MA, BEd, DipTESL, DipTchg  
[ola.niupac@gmail.com](mailto:ola.niupac@gmail.com)

Photographer: Fili Fuaava

## EVALEON BOOKS & NIUPAC PUBLISHING


Telefoni (03) 382-6674. Tuatusi meliE: [evaleon.books@gmail.com](mailto:evaleon.books@gmail.com)



Sponsors:

Evaleon Books & Niupac Publishing

*Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomai i so'o se sionara o fatuga.*






**TAALOGA PASO SAMOA ~ GAGANA E LUA**

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.

**ACROSS**

- 1. tomato (6)
- 4. mail (4)
- 8. animal (4)
- 9. drown (6)
- 11. lieutenant (6)
- 12. cement (4)
- 14. me (2)
- 15. son (6)
- 19. if (4)
- 22. air (2)
- 24. satisfy (5)
- 27. to make a Samoan broom (5)
- 28. true (3)
- 29. be up early (5)
- 30. be rubbed against (5)




LPSTavita 2018 Copyright

- 21. hour (5)
- 23. Address for God: Lau ~ (4)
- 24. thing (3)
- 25. two (3)
- 26. flash of lightning (3)


**DOWN**

- 1. man (7)
- 2. remember (7)
- 3. established (2)
- 5. herring (can) (5)
- 6. be obvious (5)
- 7. fight (3)
- 10. it is likely (4)
- 12. to plough (3)
- 13. stone (3)
- 16. courage (3)
- 17. not (3)
- 18. sarong (2)
- 20. put things inside a bag (5)

Tusi e fesoasoani:



Solution ~ Tali



*Laufatu Samoa: O se tala faasolo*

**O le peleti o Alifi**



**N**A gata la tatou tala i le fesaga'iga a le faifeau ma le tina ma le pepe e mana'omia se fesoasoani.

Na tilotilo atu le faifeau i le ulugalii o loo punonou. O le tamā ua melotagi. Ua mau lana vaai i le pepe o loo sapai e lona tina, ua tau lona mafaufau i lona afafine e tai tutusa lava le matutua. Ae 'aumalosi ma tiotio lona afafine, e le tutusa ma le tulaga o le pepe o loo vaai atu i ai. Ua ootia lona loto i le va'aiga.

"Se'i fai sa tatou tatalo," o lana upu lea, ma punou ifo i le fai loa le tatalo. Ua tatalo atu i le Alii ia faaali lona mana i le tina ma lana tama, ia faailoa le moni o ana fetalaiga i lenei aiga. Ua tatalo e peisea'i o loo ia sufi le lagi e malie maia. O lana lotu lona lua lea i se pepe. O le lotu muamua o se failele ma le pepe fou, a o lenei ua tatalo mo se pepe a oti. Ua Amene ona faapea atu lea o lana upu, "Ua lelei, sauni ni ou tou la'ei, ou te oso atu e faanoi le sa o le failautusi. Ou te fia maua vave le failautusi..." Na tula'i loa ma savali ese ae gaoioi le ulugalii e tusa ma le faatonuga.

E taunuu atu le faifeau i le laoa o le failautusi a ua sauni foi le tulafale e malaga i le taulaga. I le taulaga e nofo ai lona uso laititi ma le aiga i Taufusi. E fia alu i ai e fai lana telefoni i Niu Sila, e fia maua se tala i le malaga a lona tausii na se'i alu atu. Ua faatau atu le savali a le faifeau ma apoina mai e le tulafale ma le loto ootia, "Talofa e. Ia, vaai, o lenei lava matou te fesaga'i ae se'i valaau mai foi. Ua lelei. E leai se mea o iai."

"E maua ni asipolō i lou laoa," o le faifeau lea. "E iai, a lea e totoe a'u fualaau,' tali le failautusi. "Pe maua se lua lena ma si tina, e talitali ai le mamao o le ala," o le faifeau lea. Ua aapa ifo le tulafale i lana 'atopa'u ma tatala, ua ia fafao se pepa i lana taga.

Ua faae'e lo la sa ona aga'i atu loa lea i le fale o le aiga, o loo ua tutu mai ai le ulugalii ma le pepe e sapai e le tina.


Ua tu le pikiapu, feosofi i fafo le faifeau ma le failautusi. O le failautusi na muamua tautala, "Si'u, aumai se ipuvai e faainu ai le fualaau a lou to'alua." Ua faapea ona fai. Ua mae'a, ona faapea atu lea o le faifeau, "O mai i luma Ivale ma lau tama, leaga e la toe pefu le auala. Ma te nonofo atu ma Si'u i tua."

"Se, tatou te ofi lelei lava i luma," o le failautusi lea ua popole i le va. "Leai," tali le faifeau. "Aua le popole . . ."

"Oi, Lue, malie se'i oso atu lava i le fale o le galuega, tatou o ai lea," o le faifeau lea. Na aga atu loa le taumua o le taavale i le fale o le galuega. E tu le taavale a o loo tumu le maota i tina o le aulotu. O loo fai sa latou galuega o meataulima. Ua iloa mai le faifeau e oso atu i tua o le keli o le pikiapu. Ua taufalo mai e mata'i lenei mea fou; e iai se pasese faapitoa o i luma, a o lana susuga e supokako. Ua taliē nisi ma tilotilo mai a o savali atu le faifeau. Ua faamalo atu i le augalulue ma aga'i sa'o i le potu i tua. Ua tago i lana 'atopa'u i le to a'e ma tatala. E \$60 tala o loo totoe ai o le peleti e \$110. Ua aofa'i mai ma fafao i le taga o lona peleue. E fetau le tuu ifo o le 'ato ae mauulu atu le faletua i totonu. "E iai se mea ua tupu? A o ai si la fafine?"

"Se'i o'u fo'i mai ona fai lea o se tala," o le faifeau lea, ma savali atu loa aga'i i le taavale. Ua mautu lona nofoaga ona talo faailo atu lea i le avetaavale. Ua talo faatofa mai foi nisi o tina a o aga'i malie ese le taavale ma Vaiola. O le failautusi ua sauni e tuli le taimi. E oo foi ia te ia ua ia lagona atu le valaau o le fia ola; ua masusu malie le pepe, ua mafaufau ai foi i lana fanau laititi, o fanau a lana fanau e to'alima. Na te iloa le taua o se ulumatua i se fanau, e pei foi o lenei ulugalii. Ua manatu e fai se upu alofa i le tina mafatia. "Ou te le fiafia i le alii lea o Si'u, sa tatau ona sau e ta'u mai. Ia, o lenei ua faaeleelea le susuga a le faafeagaiga." Ua mao lana upu, ona faapea atu lea, "Ia, ae soia. O le auuuna tatou te sulufa'i uma i ai." E leai se tala a le fafine. O loo tigaina.

A o ave le taavale na oso a'e se lagona fuā i le failautusi, auā o lenei aiga e le to'a'aga i le lotu, e le faia ni mea faalelotu, a o lea ua tigaina ai i la'ua ma le faafeagaiga. Ae te'i ua ma'alo ane se manulele i luma o le ala; ua tau lona mafaufau i lona tausii o loo malaga. Ua popole ai. Talu ona lele atu i Aotearoa e le'i vili mai. Poo ola le telefoni a lona uso! Ona 'u'u mau lea e ia le foeuli ae tu lona taumatau i le vae penisini. *E fa'auau*



1. Ua faasala se pagota i le oti. E tolu ana filifiliga i le auala e oti ai: 1. lafo i le pa o iai le afi musaesae; 2. lafo i le pa o iai ni fitafita ma ni fana; 3. lafo i le pa o iai ni leona ua faitau tausagā e le'i aai. O le fea pa e tatau ona filifili e le pagota?

2. O le tamaloa o Tupe o loo tuu mai luga o le fogafale 30 o se faletalimalo; o loo ia fufuluina faamalama; na sulu ma pa'ū ai i lalo ae lei oti. E faapefea ona faamatala lenei mea?

**Tali tupua 22:**

- 1. Ua mafua ona tuli le leoleo ona ua moe ae le faia lana galuega. O ia o se leoleo po.
- 2. O le manua lenei a moliga'o, e faasolo ina leo laiti (pupuu & tau le susulu) pe a umi ona pepese (mumū.)





PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: George Soros
Aso Fanau: 12 Aukuso 1930
Ausiga: I lona tulaga o se faipisinisi manuia ma se mau'oa agalelei
Fetu: Leo

O George Soros o se tasi faipisinisi manuia a le lalolagi, e lavea i le 25 pito i luga o tagata maumea o loo soifua, \$26 piliona lona tamaoaga. E tau le iloa le aumaumea auā e mumusu e faailoa i latou, atoa foi le puipuiga; ae lauiloa le suafa o Soros ona e le gata o se faipisinisi a o se alii foi e agalelei e ala i lona 'oa. O se fua faatatau o le \$12 piliona ua na faaaluina i galuega faaSamaria agalelei i Amerika ma isi atunuu o le kelohe. O Soros o se tasi faatusa o le olaga manuia e ala i pisinisi ma inivesi tautupe. O se faata'ita'i sili foi o le miti faaAmerika i le lelei e gata ai. Ae na sosola ese lona aiga mai lo latou nuu o Hungary ina ua osofa'i lo latou atunuu e Hitila. Na o atu le aiga i Amerika a o George, 12 tausaga, na alu i Lonetona i le nonofo ai ma le uso o lona tamā. Na ulufale George i le a'oga lauiloa, London School of Economic ma a'oga ai i le faia'oga ta'uta'ua o Karl Popper. E malosi sona aafiaga i taofi faapisinisi a lana faia'oga. E afua mai tausaga 1970 le aafia o Soros i galuega fesoasoani, taulamua ai i le faatutuina o faavae (foundations) i Europa, Aferika, Asia ma Amerika foi. O sini o nei faavae o le lagolagoina o a'oga, faaleleia o le ola maloloina atoa ma pulega. E 60 atunuu o le lalolagi ua oo i ai le fesoasoani a le Soros Foundations. E lauiloa i Amerika o se sui o le Democrats. O se Iutaia i lona tupuaga. Aulia nei lona 88 tausaga.

ATI A'E UPU:

- matau (v) tilotilo toto'a i aga o se mea o loo tupu, poo ni foliga o se mea. Ft. O loo matau e le alii su'esu'e aga a loi i le fanua.
mata'i (v) tilotilo, matamata, vaai aga poo se gaoiiga. Ft. Ua mata'i lelei e le aumaimoa le siva a le taupou.
mataitū (v) ta'ita'i, pulea, faatonu se fe'au. O Simi le faatonu o le poloketi; o ia foi na te mataitū aga o lona faatinoga. (n). matai (e tu e vaai le ~ )

Tulimanu o Pola:

Haley i lu'itau o le ola & tekonoosi anamua



E viia le alofa ma le agalelei o lo tatou Matai Sili, o le puna o mea lelei uma o loo si'omia, tausia ma faamatagofie le soifua.

Se'i amata mai i Kisipone. O Haley o se tama'ita'i e nofo i Kisipone. E leai ni ona vae, e ma'ila'ila ona foliga ona o le ma'i, meningococcal na maua ai a o pepe. Ae leai se mea e le mafai ona ia faia, e alu i le a'oga, auai i taaloga, e taumafai ia 'aua ona ola faalagolago. E tofu le tagata ma lana tali atu i le upu, tiga (pain). E leai se isi e sao mai ai, ae iloa le eseese o lea ma lea i le anoa o le tali atu. A faitio umi se isi e alala i se nuu vevela i le vevela, faatali se'i alu atu e nofo i se nuu malulu. Pe faitio i le falelau, ae faitau miliona e momoe i le auala. O le tali a Haley e le o le misialofa, ae finau i ai ma talia foi le faasoa a le ola. O le lesona o le tala, a e misialofa umi i lou mafatia, manatua e iai isi e sili atu le pagatia i lo oe. O se faamanatu aoga lea.

Toe a ina leai se konetineti e le o vatau malo ma femisa'i tua'oi. O le lave lea o le pipii faatasi i se fanua e tasi, e matafanua ai le isi. E iai Rusia i le va ma nai tua'oi laiti. Rusia e aupito telē i malo uma, ae solomua le si'itua'oi. O le aogā lea o le motu ese, e pei o tatou.

O le tala mai Yemen i le fanau a'oga na o e tafafao ae lavea ai le pasi i se pulufana, maliliu ai isi, e saga faaali tino ai le tulaga moni o upufai a malo tetele. O le taua a Yemen e gata ia i latou lava, a ua oso ai fua Saudi Arabia. Lea e lagolago e Amerika ma Peretania e ala i auupega e faatau i ai. E leai se isi o nei malo o pisa pe faaleo se tete'e e ala i le fono a malo afaatasi. Ua gugu ona o tupe mai Saudi Arabia. O moni na o polokiki a malo tetele, e le tāua le feoti o ni tamaiti matitiva.

Aisea le oso fua o Saudi Arabia i le pisinisi a Yemen. O le tali o le pule faumalo. O le puipuiga o le aiga tupu, auā i le vaai a ona ta'ita'i o Yemen o le malo mativa, ua na'o se pa e puipui ai i latou mai le fili. Lea foi e fai e Rusia i ona malo tua'oi. Ua na o ni pa.

E fai fai upu nisi i tekonoosi anamua a o le mea moni e sili lava mea anamua le anagata. Ou te lagolagoina le tineia o pepa iila; ae alofa foi i nai tagata o loo galulue i nei galuega. A o se avanoa leni faapisinisi e toe lalaga ai le tekonoosi anamua o lagaga 'ato laufala launiu, ola ma enu ofe. O se faiga lelei tele.

A ua mafai e nisi ona liua pepa iila i ni vaa e fagogota ai. Pe oo i ni aso fau ai ni taavale. Lona uiga o le a faasaoina laau mai le toe taina ma maua ai pea le paleni o le okesene e manava ai, ma le kaponi tiosite e miti'ia e laau. Ua iloa atu le fiafia o nai i'a i le sami, ae faanoanoa isi, auā o pepa iila e lelei e la'u ai taumafa. Ia, o le aogā lea o le ma'ilo. Ua leva ona fai e Samoa le togafiti e fuapau ai, ave sina vaega ae le o le ave uma.

Se upu ua sala, faafo'i mai ia Pola. Manuia.

